


आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 रविवार

दिनांक 08.03.2026



प्रमुख समाचार –

1– अंतर्राष्ट्रीय महिला दिवस म प्रदेश भर म होइस कतकोन कारीकरम– बस्तर जिला म होय महतारी वंदन सम्मेलन म मुख्यमंत्री ह छै सौ इकतालीस करोड़ रुपिया ले जादा के रासि माईलोगिन मनके खाता म करीन अंतरित ।

2– छत्तीसगढ़ के कतकोन जिला म होइस अस्मिता लीग के आयोजन – पांच सौ ले जादा छात्रा अउ माईलोगिन मन ह देखाइन अपन प्रतिभा ।

अउ

3– छत्तीसगढ़ विधानसभा के बजट सत्र छुट्टी के बाद काली ले फेर होही सुरु – सदन म विभागवार अनुदान मांग म होही चर्चा ।

.....

अंतर्राष्ट्रीय महिला दिवस-01

आज अंतर्राष्ट्रीय महिला दिवस हरय । ए बछर के बिसय–“महिलाओं और बालिकाओं के लिए अधिकार, न्याय और प्रयास” हरय ।

राष्ट्रपति द्रौपदी मुर्मु ह किहीन हे कि माईलोगिन मन ह मउका अउ सहयोग मिले म हर जघा म अच्छा प्रदर्सन कर सकत हे । अंतर्राष्ट्रीय महिला दिवस के मउका म नई दिल्ली म होय एक ठिन कारीकरम म राष्ट्रपति

ह किहीन कि उद्यमिता होवय या फेर कार्पोरेट जगत माईलोगिन मन ह हर जघा म आगू बाढ़त हे। ओमन ह किहीन कि भारत देस ह माईलोगिन मन के नेतृत्व वाला विकास के दिसा म तेजी ले आगू बाढ़त हे।

उहें, केंद्रीय महिला अउ बाल विकास मंत्री अन्नपूर्णा देवी ह किहीन कि केंद्र सरकार माईलोगिन मन ल सशक्त बनाय बर समग्र दृष्टिकोण के संग आगू बाढ़त हे।

प्रधानमंत्री अंतर्राष्ट्रीय महिला दिवस

प्रधानमंत्री नरेंद्र मोदी ह आज नई दिल्ली म लगभग तैंतीस हजार पांच सौ करोड़ रुपिया के कतकोन विकास परियोजना के उद्घाटन अउ सिलान्यास करीन। ए मउका म श्री मोदी ह किहीन कि राष्ट्रीय राजधानी म सुविधा अउ बुनियादी ढांचा ल सरलमजबूत अउ विस्तारित करे जावत हे।

प्रधानमंत्री ह किहीन कि भारत, महिला सशक्तिकरण म एक नवा अध्याय लिखत हे अउ माईलोगिन देस के विकास म महत्वपूर्ण भूमिका निभावत हे। श्री मोदी ह किहीन कि भारत के महिला शक्ति ह हर जघा म नवा ऊर्जा के संग आगू बाढ़त हे अउ राष्ट्र निर्माण म जरूरी योगदान देवत हे।

अगर माईलोगिन मन ल मउका दे जाय, त कइसनो करके नवा-नवा सिध्दी हासिल कर सकत हे। मोला आज बड़ खुसी हवय कि देसभर म तीन करोड़ माईलोगिन मन ल लखपति दीदी बनाय के जउन संकल्प ले गे रिहीस ओहा पूरा हो चुके हे।

छत्तीसगढ़-अंतर्राष्ट्रीय महिला दिवस

अंतर्राष्ट्रीय महिला दिवस म छत्तीसगढ़ के कतकोन जिला म आने-आने कारीकरम के आयोजन करे गीस। बस्तर जिला म होय महतारी वंदन सम्मेलन म मुख्यमंत्री विष्णुदेव साय ह मुख्य अतिथि के रूप म सामिल होइन। ए बेरा म ओमन ह महतारी वंदन योजना के पच्चीसवां किस्त के रूप म छै सौ इकतालीस करोड़ रुपिया ले जादा के रासि माईलोगिन मनके खाता म अंतरित करीन। मुख्यमंत्री ह किहीन कि महतारी वंदन योजना प्रदेश के मातृ शक्ति के जीवन म सुरक्षा सम्मान अउ आत्म विश्वास के नवा रौसनी ले के आवत हे।

उहें, रईपुर के लोकभवन म महिला सम्मान समारोह कारीकरम म माईलोगिन मन ह फूल के होली खेलिन। ए बेरा म राज्यपाल रमेन डेका ह शिक्षा, स्वास्थ्य, पोषण, स्वच्छता अउ आदिवासी विकास के क्षेत्र म काम करइया प्रदेश के कतकोन माईलोगिन मन ल सम्मानित करीन। राज्यपाल ह किहीन कि नारी सक्ति ह ए देस के विकास के धूरी हवय अउ सरकार ह अंतिम पंक्ति के माईलोगिन मन तक विकास ल पहुंचाय बर काम करत हे। ओमन ह किहीन कि छत्तीसगढ़ सरकार ह घलो माईलोगिन मनके उत्थान अउ सशक्तिकरण बर आने-आने योजना अउ नीति विकसित करे हे।

ओति, भिलाई इस्पात संयंत्र म अंतर्राष्ट्रीय महिला दिवस म “शक्ति दू हजार छब्बीस” के आयोजन करे गीस। ए बेरा म माईलोगिन मन बर व्याख्यान अउ प्रश्नोत्तरी जइसे प्रतियोगिता के आयोजन होइस। कारीकरम म भारतीय अंतरिक्ष अनुसंधान संगठन-इसरो के वैज्ञानिक डॉक्टर आभा छाबड़ा ह विशिष्ट वक्ता के रूप म सामिल होइन।

ओति, बीजापुर जिला के कोतवाली थाना परिसर म अंतर्राष्ट्रीय महिला दिवस म होय कारीकरम म आत्मसमर्पित महिला माओवादी मन ह हिस्सा लीन।

विधानसभा सत्र

छत्तीसगढ़ विधानसभा के बजट सत्र छुट्टी के बाद काली ले फेर सुरु होवइया हे। काली ले सदन म विभागवार अनुदान मांग म चर्चा होना हे, जउन कि सत्रह मार्च तक होही। ए सत्र चलत सत्रह मार्च के छत्तीसगढ़ विनियोग विधेयक पेस करे जाही। जबकि अट्टारा मार्च के एखर उपर चर्चा अउ पारित करे के तिथि तय करे गेहे।

“अस्मिता लीग”-01

अंतर्राष्ट्रीय महिला दिवस के मउका म आज महाराष्ट्र के छत्रपति संभाजी नगर म युवा कार्य अउ खेल राज्य मंत्री रक्षा खडसे ह “अस्मिता लीग” के सुभारंभ करीन। ए कारीकरम के चलत देसभर के दू सौ पचास ठिन जघा म एथलेटिक्स लीग के आयोजन होइस। ए आयोजन ह खेलो इंडिया के लैंगिक समानता के मिसन के हिस्सा हरय। जेखर उद्देश्य लीग अउ प्रतियोगिता के माध्यम ले माईलोगिन मन म खेल ल बढ़ावा देना हे।

ऐति, छत्तीसगढ़ के रईपुर, दुरुग, जशपुर महासमुंद अउ राजनांदगांव जिला म घलो अस्मिता लीग के आयोजन करे गीस।

रईपुर के कोटा स्थित विवेकानंद स्टेडियम म एथलेटिक्स प्रतियोगिता होइस, जेमा कतकोन आयु वर्ग म सौ मीटर, दू सौ मीटर अउ चार सौ मीटर के दउड़ होइस। जेमा पांच सौ ले जादा छात्रा अउ माईलोगिन मन ह अपन प्रतिभा देखाइन। कारीकरम के मुख्य अतिथि महापौर मीनल चौबे ह विजेता खिलाड़ी मन ल सम्मानित करीन।

माय भारत छत्तीसगढ़ के राज्य निदेसक अर्पित तिवारी ह किहीन कि माई भारत मंच के माध्यम ले हमन ह हरेक युवा ल अपन पूरा क्षमता ल पहिचाने के मउका देवत हन। खेल सिरिफ शारीरिक फिटनेस बर नो हरय, ओहा नेतृत्व लचीलापन अउ राष्ट्रीय गौरव के भावना ल विकसित करे के एक सशक्त माध्यम हरय।

उहें, दुरुग जिला के मर्गा गांव के खेलो इंडिया लघु केंद्र म घलो माईलोगिन मन बर अस्मिता लीग के आयोजन करे गीस। माई भारत के उपनिदेसक नितिन कुमार शर्मा ह बतइन कि माईलोगिन मन बर दउड़ अउ रस्साकसी जइसे कतकोन आयोजन होइस अउ ओखर मनके सम्मान घलो करे गीस।

“अस्मिता लीग”-02

अइसने, महासमुंद जिला के एकलव्य विद्यालय भोरिंग परिसर म अस्मिता लीग के आयोजन होइस। जिला युवा अधिकारी वसुंधरा साहू ह बतइन कि ए कारीकरम के उद्देश्य माईलोगिन मन म स्वास्थ्य, फिटनेस अउ खेल के प्रति जागरूकता बढ़ाना हे। कारीकरम के चलत तीन आयु वर्ग म दउड़ के आयोजन करे गीस।

एखर अलावा जशपुर के रणजीता स्टेडियम म होय अस्मिता लीग म डेढ़ सौ माईलोगिन अउ नोनी मन ह भाग लेत हुए अपन खेल प्रतिभा के प्रदर्शन करीन। जिला युवा अधिकारी सुमेधा पवार ह बतइन कि देसभर के चयनित दू सौ पचास जिला म जशपुर जिला ल घलो सामिल करे गे रिहीस।

पूर्व डीजीपी-निधन

छत्तीसगढ़ के पूर्व पुलिस महानिदेशक विश्वरंजन के पाछू रतिहा निधन होंगे। ओमन ह पटना म एक ठिन निजी अस्पताल म आखिरी सांस लीन। ओमन ह पाछू कूछू बेरा ले बीमार चलत रिहीन।

जानबा के अनुसार विश्वरंजन ह छत्तीसगढ़ के छठवां डीजीपी रहे हे। बछर दू हजार सात म राज्य सरकार ह ओमन ल छत्तीसगढ़ पुलिस के प्रमुख बनाय रिहीन। ओमन ह लगभग चार बछर तक डीजीपी के पद म रिहीन।

कोरिया-जल महोत्सव

कोरिया जिला के बैकुंठपुर विकासखंड के जमजीरा गांव म आज ले जल महोत्सव के सुभारंभ करे गीस। कारीकरम के उद्देश्य ग्राम पंचायत मन ल जल आपूर्ति संपत्ति के औपचारिक हस्तांतरण, जल गुणवत्ता परीक्षण अउ निगरानी ल मजबूत करे के संगेच सामुदायिक भागीदारी के माध्यम ले सुरक्षित पेयजल सुनिश्चित करना हे।

कार्यपालन अभियंता मनोज ठाकुर ह बतइन कि केंद्रीय जल शक्ति मंत्रालय कोति ले बाईस मार्च तक चलइया ए जल महोत्सव म आम लोगन मन अपन भागीदारी निभाही। सुभारंभ कारीकरम के दउरान जल अर्पण दिवस मनात हुए जागरूकता रैली घलो निकाले गीस। संगेसंग ग्रामीण मन ल जल संरक्षण अउ साफ पिये के पानी के महत्व के बारे म जानकारी दे गीस।

संक्षिप्त समाचार

— मुख्यमंत्री विष्णुदेव साय ह पूर्व लोकसभा सांसद स्वर्गीय दिलीप सिंह जुदेव के जयंती के मउका म ओमन ल श्रध्दांजलि दीन।

— बस्तर जिला के कलचा गांव म होय मड़ई म पाछू रतिहा दू झिन जवान लइका मनके हत्या हगे। ए मामला म पुलिस ह दू झिन युवक मन ल गिरफ्तार करे हे।

अउ

— मोहला-मानपुर जिला क बागडोंगरी म एक बघवा के गांव म आय ले लोगन म दहसत हे। वन विभाग ह सबो मन ल सतर्क रहे बर कहे हे।

